

明紀

冊
五

明

史

卷

四

明紀卷第五十九

卹贈知府銜給雲騎尉世職內閣候補中書孫男克家補纂

唐王始末

唐王聿鍵行至杭州遇鄭鴻逵及戶部侍郎何楷戶部郎中蘇觀生遂奉王入福建六月黃道周見王於衢州奉表勸進馬士英之竄也經廣德州知州趙景和疑其詐閉門拒守士英攻破之殺景和大掠而去至杭州熊汝霖責其棄主士英無以應守臣以總兵府爲福王太后行宮俄阮大鍼朱大典及總兵官方國安俱倉皇至士英請潞王常勞監國不數日

大清兵至王帥衆降尋同太后北去錢塘知縣顧咸建臨安知縣唐自彩被執死之大典還金華據城固守在籍左都御史劉宗周聞杭州失守方食推案痛哭自是遂不食移居山陰郭外有勸以文謝故事者宗周曰北都之變可以死可以無死以身在田里尚有

望於中興也南都之變主上自棄其社稷尙曰可以死可以無死以俟繼起有人也今吾越又亡矣老臣不死尙何待乎若曰身不在位不當與城爲存亡獨不當與土爲存亡乎此江萬里所以死也出辭祖墓躍入水中水淺不得死舟人扶出之絕食二十三日而卒宗周且死語門人曰學之要誠而已主敬其功也敬則誠誠則天良知之說鮮有不流於禪者其門人舉人祝淵諸生王毓著並死焉時少詹事徐汧作書誠二子投水死大學士高宏圖流寓會稽逃野寺中絕粒而卒吏部尙書張慎言疽發於背戒勿藥卒蘇松巡撫都御史祁彪佳端坐池中而死吏部尙書徐石麒朝服自縊死行人陸培及邵武同知王道焜皆投繯死驗封員外郎華允誠以不肯薙髮被殺故大學士吳甡工部侍郎易應昌僉都御史金光辰御史詹爾選漢中巡撫都御史高斗樞懷遠侯常延齡等俱卒於家光祿寺卿許譽卿御史成勇爲僧以終給事中姜埰

流寓蘇州以卒魯王贈宏圖太保諡文忠唐王贈彪佳少保兵部
尚書諡忠敏

大清兵下江西巡撫曠昭棄南昌遁走瑞州列城望風潰攝袁州府
事同知李時興自縊死 閏月丁亥黃道周與巡撫福建都御史
張肯堂鎮守總兵官南安伯鄭芝龍等奉唐王稱監國鴻逵請急
正位以繫人心羣臣多言監國名正建號宜遲不報丁未王卽位
於福州建行在太廟社稷以福建爲福京福州爲天興府布政司
署爲行宮改七月以後爲隆武元年追尊祖考爲皇帝妣爲皇后
遙上福王尊號曰聖安皇帝進芝龍鴻逵爲侯封鄭芝豹鄭彩爲
伯道周爲吏部尚書武英殿大學士張肯堂爲兵部尚書何楷爲
戶部尚書蘇觀生爲翰林學士餘拜官有差召何吾騶蔣德璟黃
景昉黃士俊入閣又先後召呂大器朱繼祚陳子壯王錫衮陳奇
瑜曾櫻熊開元等爲東閣大學士士俊子壯錫衮不至奇瑜道遠

未聞命景昉未幾告歸卒於家鴻逵芝豹皆芝龍弟彩芝龍族子也王以黃道周學行高敬禮之特甚賜宴鄭芝龍爵通侯位道周上衆議抑芝龍文武由是不和一諸生上書詆道周迂不可居相位王知出芝龍意下督學御史撻之寧波故刑部員外郎錢肅樂建議起兵諸生董志寧華夏王家勤張夢錫陸宇燭毛聚奎遮拜肅樂倡首士民集者數萬人肅樂乃建牙行事郡中監司守令皆逃惟一同知治府事肅樂索取倉庫籍繕完具守時定海總兵官王之仁已納款故太僕寺卿謝三賓方從江上迎降歸害肅樂所爲貽之仁書屬斬肅樂等七人肅樂亦遣客倪懋熹以書告之仁勸其來歸之仁兩答書翊日之仁至出三賓書袖中對衆朗誦欲殺之以祭纛三賓請輸饒萬金乃釋之於是肅樂與之仁締盟共守聞魯王以海在台州遣舉人張煌言奉表請監國會故九江兵備僉事孫嘉績與熊汝霖起兵餘姚諸生鄭遵謙起兵紹興

在籍兵部尙書張國維等乃朝魯王於台州請王監國卽日移駐
紹興國維以原官兼東閣大學士督師江上就加朱大典東閣大
學士擢汝霖嘉績肅樂右僉都御史並督師方國安亦自金華至
與之仁並加封爵凡營兵衛軍俱隸之嘉績等惟統召募兵國安
軍七條沙之仁軍西陵遵謙軍小甕汝霖嘉績肅樂及僉都御史
沈宸荃大理寺承章正宸等軍瓜瀝列營二百餘里太僕少卿陳
潛夫監軍畫錢塘江而守王三召故大學士方逢年逢年至用其
議定稱魯監國以明年爲元年馬士英請入朝諸臣力拒之國維
劾其十大罪乃不敢入阮大鍼投大典於金華亦爲士民所逐大
典乃送之嚴州國安軍士英國安同鄉也先在其軍中大鍼掀髯
指掌曰談兵國安甚喜而士英以南渡之壞半由大鍼而己居惡
名頗以爲恨 南京旣破州縣多起兵自保左僉都御史金聲糾
集士民保績溪黃山分兵扼六嶺徽州推官溫璜與聲犄角且轉

饒給其軍故巡撫邱祖德與寧國舉人錢龍文諸生麻三衡沈壽
堯等及貴池諸生吳應箕各舉兵應之時寧國郡城已失祖德駐
華陽三衡駐稽亭三衡兵旣起旁近吳太平阮恆阮善劉鼎甲胡
天球馮百家與俱起號七家軍皆諸生也同時舉兵者有職方郎
中尹民興與涇縣諸生趙初浣青陽知縣龐昌允溧陽諸生謝球
鹽城諸生司石磐宜興中書舍人盧象觀及從弟諸生象同部將
陳安皆事敗而死惟民興走免而太倉已下諸生王湛與兄淳復
集里人數百圍城中兵出擊皆死蘇州旣降諸生陸世鑰聚衆
焚城樓福山副將魯之璵帥千人入城與

大清兵戰死象觀象昇弟也 吳淞總兵官吳志葵自海入江結水
寨於泖湖會總兵官黃蜚擁千艘自無錫至與之合故兩廣總督
侍郎沈猶龍偕同里給事中陳子龍中書舍人李待問知縣章簡
等募壯士數千人守城與志葵蜚相犄角吏部主事夏允彝入志

葵軍中

大清兵既下江西建昌副使王養正與布政使夏萬亨知府王棫推官劉允浩南昌推官史夏隆起兵拒守越三日有客兵內應城卽破養正等並被執死左懋第聞南京失守慟哭其從弟懋泰已降

大清爲員外郎來謁懋第懋第曰此非吾弟也叱出之會命薤頭中軍艾大選有二志懋第杖殺之乃收懋第入獄參謀兵部司務陳用極游擊王一斌都司王良佐王廷翰守備劉統從入訊諭之降皆不屈乃引出既至市又遣騎諭降者三終莫應懋第等遂受刑而馬紹瑜獲免嘉定之起兵也士民推通政使侯峒曾爲倡偕同里進士黃淳耀舉人張錫眉龔用圓秀水教諭馬元調諸生唐全昌夏雲蛟等誓師固守

大清兵攻之峒曾乞師於吳志葵志葵遣游擊蔡祥以七百人來赴

一戰失利東甲遁外援遂絕城中矢石俱盡秋七月壬子大雨城隅崩架巨木支之癸丑雨益甚城大崩

大兵入峒曾拜家廟投於池騎兵引出斬之二子元演元潔與錫眉等皆死之淳耀及弟諸生淵耀自縊於城西僧舍 崑山之起兵也縣丞閻茂才已遣使迎降縣人共執殺茂才推邑中故副將王佐才爲帥貢生朱集璜及儀封知縣周室瑜諸生陶炎陳大任等共拒守參將陳宏勳前知縣楊永言帥壯士百人爲助閱兩月

大清兵至宏勳帥舟師迎戰敗還游擊孫志尹戰沒乙卯城陷永言遁去佐才縱民出走而已冠帶坐帥府被殺集璜等皆死之 設

儲賢館分十二科招四方士令禮部侍郎兼翰林學士蘇觀生領之觀生矢清操稍有文學而時望不屬王以故人恩眷出廷臣右命兼東閣大學士參機務 王愛鄭芝龍子森材賜國姓改名成功命提督禁旅以駙馬都尉體統行事封忠孝伯 江西諸郡惟

贛州存孤懸上游兵力單弱修撰劉同升將入福建止零都與左庶子楊廷麟謀興復會益府永寧王慈炎招降汀贛間連子峒蠻張安兵數萬復建昌入撫州文選主事曾亨應考功主事揭重熙先後舉兵與相犄角南贛巡撫李永茂乃命副將徐必達扼太和拒

大清兵亨應被執不降死 王性儉素少遭患難卽位慨然以復

讎雪恥爲務勤於聽政重風節喜文學收召名士不次用人然國勢衰政歸鄭氏大帥恃恩觀望不肯一出關募兵大學士黃道周請自往江西圖恢復辛未啓行僅齎一月糧 魯王督師張國維

連復富陽於潛樹木城緣江要害聯合方國安王之仁鄭遵謙熊汝霖孫嘉績錢肅樂諸營爲持久計乃議分地分饗之仁國安兵食用寧波紹興台州三郡田賦肅樂等兵資富室助饗不能繼恆缺食 左良玉旣死其將馬進忠王允成無所歸突至岳州傳上

瑞大懼章曠曰此無主之兵可撫也入其營與進忠握手指白水爲誓進忠等皆從之時

大清偪湖南諸將皆畏怯曠有智略行軍不避鋒鏑獨悉力捍禦

八月鄭芝龍議簡戰守兵二十餘萬計饟不支其半請預借兩稅一年令羣下捐俸勸紳士輸助徵府縣銀穀未解者官吏督迫閭里騷然又廣開事例猶苦不足仙霞關守關兵僅數百人皆不堪用王屢促芝龍出兵輒以饟絀辭鄭芝龍鄭鴻逵兄弟橫甚郊

天時稱疾不出戶部尙書何楷言芝龍鴻逵無人臣禮王獎楷風節令掌都察院事鴻逵扇殿上楷呵止之兩人益怒楷知不爲所容連請告去途遇盜截其一耳乃芝龍所使部將楊耿也黃道周以虛聲鼓動忠義士所至遠近響應得義旅九千餘人道周至廣信與兵部侍郎詹兆恆監軍御史周定仍兵部員外郎萬文英給事中胡夢泰及湖東副使胡奇偉廣信同知胡甲桂共議城守

大王卽以定仍爲右僉都御史巡撫其地 王手書至贛加楊廷麟
吏部侍郎劉同升國子監祭酒同升乃入贛州與廷麟謀大舉偕
李永茂集紳士於明倫堂勸輸兵餉 叛將白之裔入萬安曠昭
被執知縣梁于涘死之 吳江之失也職方主事吳易走太湖與
同邑舉人孫兆奎諸生沈自炯自炳武進貢生吳福之等謀舉兵
旬日得千餘人屯於長白蕩出沒旁近諸縣道路爲梗王聞之授
易兵部侍郎兼右僉都御史總督江南諸軍提督軍務侍郎楊文
驄奏易斬獲多進爲兵部尙書魯王亦授易兵部侍郎封長興伯
大清兵至易敗走父及妻女皆死自炯自炳福之亦死焉兆奎被獲
而死一軍盡殲福之鍾巒子也

大清兵至松江吳志葵黃蜚敗於春申浦被執志葵參軍舉人傅凝
之赴水死城遂被圍未幾破沈猶龍出走中矢死李待問章簡俱
被殺華亭教諭睦明永諸生戴泓皆死之

大兵遂攻金山參將侯承祖與子世祿固守城破巷戰踰時世祿中四十矢被獲死之承祖亦被獲說之降不從被殺夏允彝徬徨山澤間欲有所爲聞友人侯峒曾黃淳耀徐汧等皆死乃自投深淵以死江陰之守城也以諸生許用德倡言遠近應者數萬人典史陳明遇主兵用徽人邵康公爲將前都司周瑞龍泊江口相犄角戰失利

大清兵偪城下徽人程璧盡散家貲充饗而身乞師於吳志葵志葵至璧遂不返康公戰不勝瑞龍水軍亦敗去明遇乃請前典史閻應元入城屬以兵事

大兵力攻城應元守甚固降將劉良佐用牛皮帳攻城東北城中用礮石力擊良佐乃移營十方菴令僧陳利害良佐旋策馬至應元誓以大義屹不動及松江破

大兵來益衆四面發大礮城中死傷無算猶固守乃令志葵黃蜚至

城下說城中人降志葵說之蜚不語城迄不下庚子

大兵從祥符寺後城入衆猶巷戰男婦投池井皆滿明遇用德皆舉
家自焚應元赴水被曳出死之訓導馮敦厚冠帶縊於明倫堂里
居中書舍人戚勳舉人夏維新諸生王華呂九韶皆死時貢生黃
毓耆與門人徐趨舉兵行塘以應城內兵城陷兩人逸去後趨偵
江陰無備帥壯士十四人襲之不克皆死毓耆以敕印事發死
壬辰冊妃曾氏爲皇后命總兵官黃斌卿出鎮舟山方國安
王之仁渡江襲杭州敗還

大清兵追敗馬士英於餘姚國安於富陽無何士英國安帥衆窺杭
州復敗 九月甲寅

大清以福王歸京師王召路振飛爲左都御史募能致振飛者賜
五百金官六品振飛乃赴召道拜吏部尙書兼文淵閣大學士至
則大喜王每責廷臣怠玩振飛因進曰上謂臣僚不改因循必致

敗亡臣謂上不改操切亦未必能中興也上有愛民之心而未見愛民之政有聽言之明而未能收聽言之效喜怒輕發號令屢更見羣臣庸下而過於督責因博覽史書而務求明備凡上所長皆臣所甚憂也其言曲中王短云

大兵屯泰和徐必達戰敗至萬安遇李永茂永茂遂奔贛州永寧王慈炎以糧盡退保建昌吏部侍郎楊廷麟國子監祭酒劉同升乘虛復吉安臨江加廷麟兵部尙書兼東閣大學士賜劍便宜從事加同升詹事兼兵部侍郎同升已羸疾日與士大夫講忠孝大節聞者感奮先是金聲遣使通表王授聲右都御史兵部侍郎總理諸道軍聲拔旌德寧國諸縣會徽故御史黃澍降於

大清

大兵間道襲破聲聲被執至江寧與門人監紀諸生江天一皆死監紀推官吳應箕敗走山中被獲慷慨就死王贈聲禮部尙書諡文

毅靖江王亨嘉自稱監國於廣西謀僭號召巡撫都御史瞿式耜式耜拒不往而檄思恩參將陳邦傳助防止狼兵勿應亨嘉調亨嘉至梧州劫式耜幽之桂林遣人取其印敕初式耜與在籍尙書陳子壯等議立桂端王常瀛子由棖及唐王監國式耜以爲倫序不當立不奉表勸進至是被幽乃遣使賀王因乞援王喜而亨嘉爲總督丁魁楚所攻勢窘乃釋式耜式耜與中軍參將焦璉召邦傳等襲執亨嘉以捷聞王廢亨嘉爲庶人殺之封魁楚平粵伯留鎮兩廣擢式耜兵部侍郎協理戎政以晏日曙來代式耜不入朝退居廣東初李自成屯武昌賊衆尙五十餘萬尋爲

大清兵所迫部下多降或逃散自成走咸寧蒲圻至通城竄於九宮山留李過守寨自帥二十騎略食山中爲村民所困不能脫遂縊死或曰村民方築堡見賊少爭前擊之人馬俱陷泥淖中自成腦中鉏死剝其衣得龍衣金印眇一目村民乃大驚謂爲自成也